

# Munconza da spirituals : ina reflexiun

Autor(en): **Suso**

Objekttyp: **Article**

Zeitschrift: **Igl Ischi : organ della Romania (Societat de Students Romontschs)**

Band (Jahr): **60 (1975)**

Heft 4

PDF erstellt am: **20.06.2024**

Persistenter Link: <https://doi.org/10.5169/seals-882389>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

# Munconza da spirituals

Ina reflexiun da Suso

## Remarca dalla redacziun

Il sequent artechel ei excepziunalmein publicaus cun in pseudonim. Ils motivs ein per part persunals – e per amur dalla caussa para quei dad esser la megliera sligiazion.

La remarca ch'igl autur fa viers la fin da siu artechel pervia da persunas pli veglias che duessien ver access al sacerdozi fuss d'amplificar en quei senn ch'ina tala pusseivladad ei dada oz. Entras la schinumnada «tiarza via» dil studi teologic sa era in um pli passau entrar el survetsch da pastoraziun, e quei senza stuer entrar el seminari.

Las statisticas che cumparan egl artechel ein procuradas dalla redacziun per dar al lectur ina survesta dil svilup en nossa diocesa, specialmein el Grischun ed ella Surselva.

-n -n

Il conredactur responsabel dalla sparta religiosa ha dumandau mei, schebein jeu vegli scriver en quei numer digl Ischi ina reflexiun sur la munconza da spirituals. Cun la resalva che mia reflexiun savessi fors'esser onz persunala, subjectiva, hai jeu acceptau.

Pli ditg che jeu emprovel da nudar mes patratgs e miu sentiment, e pli fetg che jeu s'encorschel che mia resalva ei stada giustificada. Per ina ei quei problem vasts e complex, aschia ch'igl ei buca pusseivel da dar risposta a tut las damondas ch'el cuntegn e ch'el schendra. In artechel da zacontas paginas sa buc esser zatgei auter che l'expressiun d'in pugn da vesta solitari e restrenschiu. Per l'otra fuss ei necessari da ver certs uaffens scientifics – statisticas, retschercas e questiunaris –, sch'ins less propi mussar en detagl l'evoluziun dil diember da spirituals duront ina perioda empau pli liunga ed analisar las raschuns positivas e negativas che influenzeschan quell'evoluziun. Sche jeu acceptel tuttina da scriver, sche fetsch jeu quei cugl intent da metter en rocla ina discussiun. Quei problem vegn e sto vegnir tractaus largiamein e cun pazienza e curascha da tut quels che prendan art e part dalla veta dalla Basalgia. Miu meini personal less contribuir in ton a quei span e debat.

## A. Munconza u diminuziun?

Setract'ei da munconza? Ins duess buca rispunder memia spert «gie». Igl ei segir, e las cefras savessen confirmar quell'affirmaziun, ch'il diember

da spirituals sminuescha e ch'il diember dad umens giuvens che sepreparan per la lavur da spiritual sminuescha aunc pli fetg. Seminaris ed instituts baghegiai aunc avon diesch, vegn onns, ein oz bunamein vits u vegnan duvrai dad auters cussadents. Segir essan nus pia en preschientscha d'ina sminuida. Mo quella sminuida u diminuziun ei buca generala. Ei dat tiaras che san porscher cefras pli positivas, denter auter tiaras ch'ei dapi varga vegn onns sut domini e sistem marxist-communist. Jeu hai viu la stad vargada en Jugoslavia, vid la porta-baselgia d'ina pleiv, la gassetta diocesana cun las fotografias da quels ch'eran vegni «benedi» quest fenadur: varga 40 giuvens spirituals, seculars e regulars. Avon quarter onns hai jeu visitau damaneivel da Prag in convent da paders e viu leu in tschéc diember novizs. A Litomerice el seminari: ina roscha seminarists, giuvens e certins meins giuvens, da provegnientscha sociala fetg variusa. – Ins savess ver igl empruament da manegiar ch'il prighel, la difficultad, la smanatscha politica, la miseria materiala, ch'ei il paun da mingadi dalla Baselgia en certinas da quellas tiaras, hagian dau ad ella in anim pli grond per mantener e sviluppar la cardientscha cristiana e la cuminonza dils cristifideivels, ferton che la situaziun politica ed economica en nossas tiaras hagi empau alla ga fatg ir a piarder quei anim. Jeu sun perschuadius che quei meini cuntegn in ton verdad. Auters motivs existan denton era, e jeu pretendel buca ch'ei seigi lev d'explicar las constataziuns fatgas. Il sulet resultat da quei punct less esser che la diminuziun vala buca per l'entira Baselgia.

Quei vul era dir ch'ins dueigi veser quei problem, sco tuts auters, dil pugn da vesta dall'entira Baselgia. La Baselgia ei mundiala. Era sche nus vegnin a stuer considerar certs aspects locals, particulars – gie: romontschs – da quella damonda, sch'astgein nus buc emblidar che la Baselgia ei universal. Eis ei buca culs spirituals sco sil marcau internaziunal cul graun, il zucher, il ris ed autras victualias: quei che manca ei buca la quantiad ni il diember, mobein la distribuziun gesta denter tut quels che drovan els?

Ei setracta da decider, tenor tgei criteris ins vul giudicar e mesirar il diember da spirituals. Sminuida u munconza? Munconza, sch'ins ei dil meini ch'ins stoppi ver e mantener il diember ch'existeva pli baul en nossas cuntradas. Nossas cuntradas: quei vul dir ellas cuntradas da bunamein tut las tiaras dall'Europa catolica. Ei stat denton scret negliu che quella situaziun stoppi exister vinavon ed adina. Nus stuein bandunar il siemi e l'illusiuin d'ina Baselgia medievals, ch'ei semantenida tier nus tochen vaden els onns 50–60 dil vegnavel tschentaner. Per star pil mument vid il problem dil diember, san ins dir senza sterment che la Baselgia hagi giu

tier nus onns e decenniș grass, mo che si' existenza seigi buca periclitada, sch'il diember dils spirituals ei oz tier nus meins gronds. Ils mieds da transport e da comunicaziun san per part remediar il manco da persunal; l'organisaziun dallas pleivs ei buca perpetna e sa vegnir modificada tenor criteris novs.

Ins sa veser quella damonda sut quei aspect pratic, sco in «schef dil persunal» vesa ils problems d'ina fabrica u d'ina fatschenta. In'organisaziun pli raziunala fa buca donn a nos uestgius, ed ei para che nos uestgs hagian buca sterment da far certs pass en quei senn. Tgei vulan ei era far auter! Ils cristifideivels da mia generaziun – quels da ca. curont'onns – seresentan aunc udend che quell'u tschella caplania seigi tuttenina senza caplon; ch'ina vischnaunca cun plirs uclauns, che veva pli baul dus treis augsegners, hagi oz mo in pli. Reacziun visceral, sentimental, che nus auters stuein emprender da curreger, e ch'ils giuvens han scadin cass buca pli.

---

#### *Situaziun dil clerus en Surselva*

##### a) Diember dils

spirituals

en pastoraziun:	1935	1945	1955	1965	1975
	53	53	54	48	38

b) Diember dallas	1935–39	1940–44	1945–49	1950–54	1955–59
messas nuvialas:	11	13	5	7	9
(mintgamai	1960–64	1965–69	1970–74		
5 onns)	11	6	1		

Cun autras cefras: 1935–1954: 36  
1955–1974: 27

---

Quella vesta organisatorica, ruasseivla, nundramatica, senza panica, ei buca fallida. Ella vegn denton buc a parer sufficiente a quels che sentan pli profundamein il misteri dalla Basalgia e dil spiritual: cumbat cul prenci maldau da quest mund, opposiziun denter la cuminonza dils sogns e la «pleiv pervertida» da Satan. Quei ein buca expressiuns che sveglian semplamein reminiscenzas litteraras u sentimentalas (Bernanos, p. ex.). Quei ei era il lungatg digl Evangeli e dalla Palentada. Concretamein vul quei dir

che nus stueien quintar cun la pusseivladad da midadas profundas e che nus saveien buca sclauder la visiun (u la hipotesa) d'ina cuntrada romon-tscha decristianisada, da baselgias vitas e bandunadas. Nossas baselgias barocas ein las perdetgas expressivas d'ina vitalitad cristiana nundetga. Ei dat denton negina garanzia – denò la garanzia dalla cardientscha, ch'ei resca – per che quellas perdetgas daventien buc in di segns mets e tgeus dil vargau e passau. La Burgundia ei stada in center da veta monastica e cristiana duront tschentanners; oz ein sias bialas baselgias romanas in'atracziun turistica ed artistica. In plevon fa il tur da ver diesch-dudisch vitgs ed uclauns, per radunar inaga cheu ed inaga leu ils paucs fideivels da sia pleiv. Tgei facturs religius, politics, socials ed economics han collabourau per scarsar empau allaga la fervur cumineivla d'in entir pievel? Era sche la scienza historica e la sociologia san oz explicar in ton quei svilup, sche vonz'ei in spazi nua che las enzenas da damonda stattan davon nus cun tutta forza: cu ha la veta cristiana da quellas regiuns entschiet a sesminuir? Tgei forzas han cediù gl'emprem? Tgei sems han palesau tscheu e leu munconzas e fleivlezias pli e pli grondas? Tgei rola ha il clerus giugau en tut quei svilup? Quellas damondas han in senn post factum. Tgi vess saviu – e tgi sa – rispunder ad ellas duront il svilup sez? Paran ellas buca el mument sez scandalusas, blasfemicas? Il problem dils spirituals ei identics cul problem dil pievel cristian sez.

### *B. Dar plaid e fatg*

Nus constatein sminuida, eventualmein munconza. Quei vegn da dus facturs:

– Diminuziun dil diember da spirituals gia benedi ora. Alla sperdita progressiva entras vegliadetgna e mort s'aschunta il fatg – oz pli impurtonts che pli baul – ch'in ualti grond diember da spirituals han midau la professiun e bandunau lur funcziun ed uffeci.

– Diember fleivel, fetg fleivel da candidats, seminarists e novizs. Quei vul dir ch'igl avegnir da tons e tons posts da pastoraziun seigi periclitau. La sminuida vegn a sefar sentir pli e pli fetg ils proxims onns.

Quels dus facturs vegnan a ver per part las medemas ragischs, e tuttina sto la reflexiun leusurlunder distinguer las raschuns explicativas. Jeu vegnel ad exprimer cheu quellas che jeu creigel da veser ch'ellas hagian la pli grond'impurtonza. En quei che pertucca il manco da candidats savein nus mo far certas hipotesas. Pertgei s'annunzian oz pli paucs giuvens el seminari ed els noviziats dils Uordens religius che pli baul? Ils giuvens

sezs ston empruar da rispunder a quella damonda. Dil reminent vegnan els, sch'ei legian quei artechel, a dir ch'igl autur – e quels ch'el representa puncto vegliadetgna ed experientscha – sappi buca dar risposta en lur num. Quella remarca ei gesta, denton buca diltut. Jeu sun dil meini ch'ils giuvens persuls sappien era buca rispunder clar e bein. Las raschuns che fan eleger quella u l'otra «clamada» e professiun ein buca mo persunalas. Facturs sociopolitics da pliras sorts influenzeschan per gronda part la decisiun ch'ei da prender, senza che quels facturs daventien adina veseivels. Leutier vegnan aunc facturs psicologics, per part buca cunscients. Las statisticas universitaras e professiunalas muossan che la proporziun da midada d'orientaziun suenter in cert temps da studi ei fetg gronda. Quei po, silmeins per part, confirmar miu meini cheusura. Facit: la risposta alla damonda iniciala sa mo ina discussiun denter giuvens – maturands p.sem. – e pli vegls empruar da dar. Da mia vart present'jeu cheu zacons puncts da discussiun:

– La conjuntura economica dils onns suenter l'uiara ha aviert a bunamein tut ils giuvens tontas pusseivladads fascinontas, buca mo dil pugn da vesta finanziel, mobein era pli largiamein: viadis, retscherca scientifica, posiziun sociala eav., che la clamada sacerdotala ha buca pudiu mantener igl aspect positiv ch'ella veva pli baul. Quei ha da far nuot cun ina reproscha d'egoissem u da materialissem; dil reminent contribuescha quei er'empau a sparter igl aspect veramein evangelic dalla clamada religiosa digl aspect social, dil «prestige», ch'il clerus veva conquistau tier nus duront liungs decennis.

– Il factum ch'il stadi e ch'instituziuns profanas han priu amauns ina gronda part dil sector social – pauperesser, malsauns, glied veglia, scolaresser specialisau eav. – ha introduciu empau allaga in'autr'idea ed in auter spért en quei che partegn la lavur en quei sector. Enstagl da sacrificontadad, da «far dil bien», plaid'ins oz da lavur sociala, da cumpetenza, da survetsch specialisau, exequius en cundiziuns regularas puncto temps da lavur e remuneraziun. Quei vul dir ch'ina part digl ideal che motivava pli baul dabia giuvens en lur decisiun da vegnir spirituals, sa oz vegnir realisada sin outra mod'e maniera. Certas qualitäts moralas ch'ins cussegliava pli baul als candidats eventuals al sacerdocci san era vegnir duvradas – sut nums empau midai – en auters loghens: buontad, pazienza, carezia proximala, humilitonza.

– Quella «sviada» dil sector religius al sector social ha buca mo ina significaziun idividuala. Ella cuntegn ina certa critica – positiva e negativa – dalla Baselia. Per ina vul ella dir – e quei ei positiv – che la Baselia hagi duront liung temps fatg lavur supplementara en differentas spartas che

*Seminari da s. Glieci, Cuera*

Diember dilis	1960	1961	1962	1963	1964	1965	1966	1967	1968	1969	1970	1971	1972	1973	1974
students da teologia	72	63	56	57	57	55	61	60	51	52	38	35	24	27	22
a Cuera	2	-	3	3	6	12	11	17	25	18	32	23	28	30	25
ordeifer	74	63	59	60	63	67	72	77	76	70	70	58	52	57	47
total	18	14	13	14	13	10	7	9	9	7	11	8	8	7	7
Grischuns	15	12	10	8	6	4	2	2	3	3	7	6	6	4	4
da quels Romontschs	3	3	3	3	4	13	15	17	17	11	15	13	14	12	8
dad autras diocesas															
<i>Per cumparegliaziun</i>															
a) 4 onns															
studi da teologia	1936	1937	1938	1939	1940	1941	1942								
total	70	68	70	77	71	65	69								
Grischuns	12	18	17	20	18	16	13								
da quels Romontschs	6	10	10	13	13	10	10								
b) 5 onns															
studi da teologia	1943	1944	1945	1946	1947	1948	1949	1950							
total	75	68	67	73	72	59	56	53							
Grischuns	17	12	11	13	15	13	13	14							
da quels Romontschs	12	8	7	7	8	9	7	5							

s'audan buca strictamein tier sia missiun essenziala. Pia eis ei normal ch'ella surlaschi quell'ovra ad auters leu nua che quei ei pusseivel (ovras caritativas, scolas etc.). En quei senn eis ei era normal ch'in ton dils giu-vens anflien leu lur camp d'actividad professiunala. Era quei ei ina clama- da. – Sper quella lingua critica positiva vesein nus denton era ina lingua anzi negativa. Las structuradas ed il spért che regian ella Baselia cunten- tan buca tuts. Autras fuormas e manieras da lavur e da survetsch pil pro- xim paran pli nizeivlas, libras, imaginativas, meins marcadas dil vargau e passau, dalla tradiziun e dalla rutina. Biars ein oz buca prompts pli e sede- claran buca habels pli da purtar l'etichetta instituziunala catolica. Ei se- tracta savens schizun d'ina questiun da cunscienza, da sinceradad.

– Ins savess aunc sviluppar cheu l'allusiun ch'ei curdada anson davart la situaziun dalla Baselia ellas tiaras sut domini communist. Tier nus stat la Baselia ufficiala en ina retscha cun autras instituziuns venerablas sco p. ex. l'universitad, las partidas politicas, ils sindicats, l'armada, era la Ba- selgia protestanta eav., en quei senn ch'ina perioda da pasch, da ruaus, ha empau allaga sminuiu lur vart cumbativa e creativa. Cheutras ein la ge- stiun administrativa, il manteniment digl uorden, dil status quo, la rutina quotidiana, las varts umbrivaunas e negativas semantifestadas, clamond igl emprem criticas e polemicas, mo dend suenter vau plitost alla resigna- ziun, all'indifferentadad e malsegirtad. La disa muenta buc, ella stuncen- ta, era leu nua ch'ei setracta dalla sontga Baselia, cumponida da car- stgauns pucconts. Oz sto la Baselia dir a sesezza quei ch'ella ha detg a nus individualmein: «In patientia vestra possidebitis animas vestras». Pa- zienza el senn da tener la dira, affruntar la tentaziun da sedesperar. Mo ei ha era num crear, anflar vias novas. Jeu arrivvel al secund factur:

### *La sperdita da spirituals gia activs*

Era cheu setract'ei per part da hipotesas, era sche l'analisa da fatgs var- gai e presents sa dar in cert fundament alla reflexiun. Igl intent ei denton buca da far ina bilanza dil vargau, mobein da veser, schebein las ra- schuns che han motivau il cal e la midada influenzeschien buc era in ton da quels che savessen e lessen esser candidats al sacerdoci ella Baselia da damaun. Pia in'emprova da remedura, schi lunsch sco pusseivel.

Partenent il vargau less jeu denton far ina remarca iniziala. Jeu hai detg che da biars spirituals hagien bandunau lur uffeci, lur funcziun. Jeu hai buca scret, e vegnel era buc a scriver: bandunau lur clamada. Quei che nus essan disai da numnar «clamada» ei ina cussa che pertucca la cun-



scienza da mintga soli. Pia sa mo el purtar quella responsablada, e mo Diu sa giudicar la fideivladad u la malfideivladad. La Baselia pren mo disposiziuns externas. Plinavon ston ins bein era veser che quella «clamada», era autentica e vera, ei savens curdada – e croda fors' aunc oz – sin in terren psicologic confus, malsaun, nunstabel. Ina certa moda e maniera da propagar ed explicar igl ideal sacerdotal als buobs e giuvens – ed a lur geniturs! – ha buca mo ignorau quei prighel, mobein schizun engrondu el, silmeins en certs cass. Ei setracta pia oz da trer e d'acceptar las consequenzas.

Enamiez la dispeta stat il problem digl «ideal sacerdotal». El ei il tema primordial, el cuntegn las raschuns fundamentalas dalla crisa dil spirtualessen e munglass puder vegnir scalprius ed explicaus inaga ditg e liung. Ei setracta gie buca mo dalla definiziun teologica dil sacerdozi, mobein dalla concarschientscha (il plaid sintesa par'a mi memia abstracts) da plirs elements: teologics, historics, psicologics, educativs, iconografics, linguistics ed aunc auters. Quels elements secumponan adina puspei danovamein el ravugl da mintga famiglia cristiana ed en spért e cor da mintg'affon. Quei maletg persunal, familial, quella spezia dad archetip, da figura u semeglia dinamica, ei era per part dependenta d'in maletg collectiv. In indeci tonscha per mussar, con complex, problematic ed ambivalents quei maletg sa esser. Quei indeci ei l'abundanza da plaid romontschs che nus possedein per numnar igl «um da Diu». Nus schein: augsegner, «sur», spirtual, prer, sacerdot. Tschun expressiuns sil pli pauc, senza quintar ils nums pli funcziunals (plevon, caplon, pader, pastur dallas olmas, predicatur eav.)! Rihezia e confusiun, maunghel da precisun. Tgei vulan quels plaid dir? Tgei cuntegn e tgei maletgs revelan e zuppentan els? Han els in tun positiv u negativ? Ei dat da far leu in di ina retscherca filologica e teologica da grond'impurtonza. Ei par'a mi ch'il lungatg actual sustegni buca pli la capientscha da quei ch'el indichescha en las expressiuns numnadas. Pia ston ins encurir plitost dalla vart da noss'experienscha. Jeu dun cheu mo zacons impuls:

– Igl «ideal sacerdotal» sto vegnir fundaus danovamein neu dil Niev Testament, en cuntegn e lungatg. Il Concil ha entschiet quella lavur en quei che pertegn l'elucidaziun teologica e da principi. Mo ei drova bia temps e grond'imaginaziun affectiva per crear in niev maletg, novs motivs, in ideal niev. En emprema lingia ha ei num anflar in maletg pli evangelic dalla Baselia sezza. Ins sto dar al batten ed alla creisma lur senn positiv; art e part e semegliadetgna cul sulet sacerdot, profet e retg, Jesus Kristus. Pievel da retgs e sacerdots: quei ei il maletg fundamental ch'ins sto promover, suenter tschantaners d'emblidanza. La peisa ch'ei vegnida messa

ton savens sil verset dil psalm «tu es sacerdos in aeternum», la sanctificaziun e la pietusadad, igl ideal da perfecziun morala, quei sto vegnir uniu directamein cun batten e creisma. Jeu hai l'impressiun ch'ins hagi sfurzau bia memia fetg tut quei vi silla vart dils «spirituals», sco per fixar (fixaziun psicologica!) zanza concretamein certs ideals buca realisai u ch'ins crei da buca saver ni stuer realisar sez persunalmein. Da leu quella mischeida d'admiraziun, da respect surfatg pils spirituals (cunzun da messas nuvialas) e da severitad el giudezi sur ils spirituals; da sentimentalitad e distanza. Il spiritual vegn mess dapersei, tschentaus pli ad ault, mess finalmein ordeifer. Quei corrispunda tuttavia buc alla voluntad dil Segner ni alla realitad dalla cuminonza dil Niev Testament. Leu ei il spiritual quel che stat el survetsch dalla cuminonza, per radunar e direger ella, per benedir e consecrar paun e vin che la cuminonza sezza unfrescha en uniun cul sulet sacerdot Jesus Cristus. Il spiritual ei suttameis alla cardientscha sco mintga battegiu; la tscherca dalla perfecziun cristiana vegn fatga ensemen, da spirituals e laics, sco da frars. En quei grau regia buca la hierarchia clericala, mobein la hierarchia dalla pli u meins gronda carezia.

– Ins sa concretisar in ton quels postulats cun in pèr exempels. Entras il sistem dils seminaris ei la preparaziun alla veta ed alla lavur pastoral da ventada onz ina caussa individuala, pertuccont il candidat sez, sia famiglia, ses superiors e scolasts. Stil universitari! Pauc ni nuot per favorisar gia duront la preparaziun il ligiom denter spiritual e cuminonza, jeu vi dir: il ligiom veritabel e da mintgadi. La pastoraziun ei buca mo in dun ed ina grazia, ella sto vegnir emprida ed experimentada. – Tras insister sin igl ideal da sontgadad, da «alter Christus», han ins zuppentau e sclavinau il fatg ch'il sacerdozi cristian ei buca cheu per la sanctificaziun persunala dil candidat, mobein per la sanctificaziun e l'edificaziun dil pievel – la pleiv, la «plebs» –, da cristifideivels. Cheutras ei la «gliesta da vertids» vegnida sfalsificada vi dalla vart dalla pietusadad, dalla mudestiadad, dalla humilitonza, dalla schubradad eav., schond ell'umbriva las qualitats bia pli specificamein «sacerdotalas»: la capacitad da menar e direger «cristianamein» (q.v.d. ni fleivlezia ni dictatura spirituala) ina pleiv; la vera prudientscha (e buca mo la prudientscha temeletga!); il respect dalla cumpetenzza da tut ils cristifideivels; la forza ed energia vitala pil survetsch fratern ed amicabel da tut las categorias da fideivels: affons e carschi, femnas ed umens; la luciditad en fatgs spirituals e psicologics; il senn gest en caussas finansialas. Il manco da quella vart seresenta oz, en perioda da moviment e da contestaziun, bia pli spert e pli hanadamein che pli baul, nua che tema, respect e pazienza schevan in pli grond spazi

Seminari da s. Glieci, Cuera

Cuors finals 1968-1974

	1968/69	1969/70	1970/71	1971/72	1972/73	1973/74
onn da studi						
total students 5. cuors	*12 (-)	12 (-)	14 (1)	14 (-)	6 (2)	10 (-)
seschai ordinar	6	8	6	9	5	4
en survetsch da pastoražiun						
sco teolog laic	1	2	5	3	2	3
buca en survetsch da pastoražiun	2	2	1	1	-	-
claustrals	3	-	2	-	2	2

\* en parentesa il diember diils Romontschs

denter pastur e muntanera. – Il problem dil celibat, silmeins per part, duei era vegnir tschentaus en quei connex, e buc adina dapersei. Jeu sun encunter quels che lessen remediar la munconza da spirituals entras dismetter il celibat. Quei ei in maunghel da respect enviars la lètg. Mo igl ei necessari ed urgent da scaffir in auter senn e patartgament en quei che pertucca la sexualitad e si'impurtonza per tut la veta affectiva. Il silenzi, l'ignoranza, il squetsch moral, il senn purmein negativ dalla schubradad etc. han giu ed han aunc oz consequenzas negativas, buca mo directamein per singuls spirituals, mobein era per biaras famiglias e per la vitalitad dalla Basalgia. – In'autra damonda fors'aunc pli impurtonta ei quella, schebein igl ei bien per la Basalgia ch'ella enqueri ses spirituals adina mo denter ils giuvens, tenor igl usit dils davos tschentaners. Quei tucca tut il principi dalla formaziun clericala, mo era il cuntegn ch'ins dat alla «clamada» sacerdotala, alla situaziun sociala e professiunala dil spiritual, al diaconat. Jeu sai buca far cheu dapli che silmeins numnar e tschentar quella damonda.

#### *Conclusiun*

Ei po parer empau onz lev da far quel che dat indicaziuns, senza ver sez da prender amans la lavur ch'ei da far. Jeu hai tuttavia buc el senn da semetter a suosta, era sche la gronda part da miu artechel ei plitost indicativa. Sche silmeins zacontas indicaziuns pon daventar muossavias e contribuir alla discussiun, sch'ei miu scopo contonschius. Nus vegnin buc a saver untgir la burascla. Mo nus savein empruar da buc affruntar ella culs egls claus.

